



Samningur



Landspítali



Þjónustusamningur

Verkefni – nr. 14466

Um rekstur hjúkrunardeildar, L-1 á Landakoti samkvæmt heimild í 30. gr. laga um heilbrigðisþjónustu og 30. gr. laga nr. 88/1997 um fjárreiður ríkisins.

Fylgigögn samnings eru:

- Þarfalýsing og verkefnisgögn nr. 14466 - Ríkiskaup
- Tilboð verksala
- Spurningar og svör á tilkynningartíma
- Fylgigögn varðandi heilbrigði starfsmanna

1. Kafli - Samningsaðilar og verkefni

1.1. Samningsaðilar

Verkkaupi	Landspítali kt. : 500300-2130 Eiríksgata 5 101 Reykjavík.
Verksali.	Dvalar- og hjúkrunarheimilið Grund Kt.: 580169-1209 Hringbraut 50 107 Reykjavík

1.2. Inngangur - markmið.

- 1.2.1. Meginmarkmið samningsins er að tryggja rekstur hjúkrunardeildar L-1 á Landakoti.
- 1.2.2. Þjónusta verksala skal veitt í samræmi við gildandi lög nr. 40/2007 um heilbrigðisþjónustu, lög um réttindi sjúklinga nr. 74/1997 og önnur stjórnvaldsfyrirmæli er varða þennan málaflokk.

1.3. Verkefni.

- 1.3.1. Með samningnum tekur verksali að sér rekstur á sólarhringsþjónustu átján (18) hjúkrunarrýma á Landakoti fyrir aldraða sjúklinga sem bíða varanlegrar búsetu. Áhersla verður á einstaklinga með heilabilun.

1.4. Fyrirvari.

- 1.4.1 Samkvæmt ákvæðum útboðslaga þurfa að líða 10 dagar frá því að niðurstaða útboðs er kynnt og þar til samningur er gerður. Þar sem um óformlegt verkefni er að ræða mun samningur undirritaður strax, þrátt fyrir að 10 daga frestur renni út 7. apríl enda hefur sá aðili sem einnig bauð í reksturinn sent skriflegt samþykki sitt fyrir að gengið verði frá samningum strax.

2. Kafli - Hjúkrunarþjónusta.

2.1. Hjúkrunarrými.

- 2.1.1. Hlutverk hjúkrunardeildar er að veita sjúklingum þá lækni og heilbrigðisþjónustu sem þeir þarfnast, auk aðstoðar við athafnir daglegs lífs. Þjónustan skal byggjast á einstaklingsbundnu mati á heilsufarslegum og félagslegum þörfum hvers sjúklings, miða að því að mæta þörfum hans og stuðla að bestu mögulegum lífsgæðum.
- 2.1.2. Innlagnir sjúklinga verða í samræmi við tillögur sérstaks samstarfshóps sem skipaður verður í upphafi rekstrartímabils. Í hópnum sitja 3 aðilar, einn frá verksala, einn frá öldrunarsviði og innlagnastjóri Landspítalans, sem veitir hópnum forstöðu í samræmi við verklag um stýrt flæði sjúklinga. Starfshópurinn hittist eftir þörfum á samningstímanum.

Við alla umönnun sjúklinga skal taka mið að lögum umréttindi sjúklinga nr. 74/1997

2.2. Mönnun vakta.

- 2.2.1. Mönnun vakta skal vera samkvæmt mönnunarmódeli verksala í tilboði og skal mannað starfsfólki verksala, með þeirri undantekningu þó að Landspítali tekur að sér vakt hjúkrunarfræðings aðfararnótt laugardags, sunnudags og mánudags og mun verksali hafa sjúkraliða í stað hjúkrunarfræðings á þeirri vakt. Aðkoma Landspítalans við mönnun mun þó verða endurskoðuð 1. september 2008.
- 2.2.2. Verksali skal tryggja heilbrigði starfsmanna sinna sem starfa á deildinni og að það sé í samræmi við kröfur Landspítalans

3. Kafli – Fjármögnun.

3.1. Greiðslur til verksala.

- 3.1.1. Greiðslur til verksala eru í formi daggjalda, að upphæð kr.19.797,- (nítjápúsundsjöhundruðnítíuogsjö). Framlög miðast við að verksali beri fulla fjárhagslega ábyrgð á öllum rekstri sínum, þ.m.t. á greiðslu launa, lífeyrисиðgjöldum vegna starfsmanna sinna, starfstengdum kostnaði eins og t.d. launum í barnsburðarleyfi, launum staðgengla vegna lengri veikinda, námsleyfa og námskostnaðar, svo og hugsanlegum bótakröfum frá starfsmönnum.
- 3.1.2. Mánaðargreiðslur munu aldrei vera lægri en sem nemur 98% nýtingu
- 3.1.3. Komi til launahækkana umfram 6% á árinu 2008 munu launabætur koma í formi eingreiðslna. Frá 1. janúar 2009 munu gjöld taka sömu hækkunum og greiðsla daggjalda Tryggingastofnunar ríkisins.
- 3.1.4. Greiðsla fer fram fyrsta virka dag hvers mánaðar miðað við 95% nýtingu og það sem uppá vantar samkvæmt reikningi innan 10 virkra daga frá dagsetningu hans.

4. Kafli – Almenn ákvæði.

4.1. Eftirlit með framkvæmd samningsins.

- 4.1.1. Verkkaupi hefur eftirlit með framkvæmd samnings þessa og áskilur sér rétt til að skoða aðstæður þar sem þjónusta samkvæmt honum er veitt og kalla eftir skýringum og upplýsingum sem hann telur þörf á hverju sinni.
- 4.1.2. Landlæknir hefur faglegt eftirlit með störfum verksala og gæðum þjónustu hans, sbr. lög um heilbrigðisþjónustu, lög um Landlækni og reglugerð um eftirlit landlæknis með rekstri heilbrigðisþjónustu og faglegar lágmarkskröfur.
- 4.1.3. Ríkisendurskoðun getur framkvæmt fjárhags- og stjórnsýsluendurskoðun á samningnum samkvæmt lögum nr. 88/1997 um fjárreiður ríkisins, lögum nr. 86/1997 um Ríkisendurskoðun og reglugerð nr. 343/2006 um samninga og rekstrarverkefni sem ráðuneyti og ríkisstofnanir gera til lengri tíma en eins árs.

4.2. Gæði þjónustunnar.

- 4.2.1. Þjónusta verksala skal uppfylla þær kröfur sem gerðar eru í gildandi lögum og reglugerðum um málaflokkinn á hverjum tíma. Verksali skal almennt setja sér það markmið að veita þeim sem til hans leita eins góða þjónustu og kostur er. RAI mat skal framkvæmt samkvæmt reglugerð þar að lútandi.

- 4.2.2. Verksali skal ábyrgjast að sjúkraskrár séu haldnar fyrir alla sjúklinga og rituð séu læknabréf fyrir þá sem útskrifast. Við skráningu á hjúkrunardeild mun verksali fá aðgang að sjúkraskrá sjúklings innan kerfis Landspítalans. Sjúkraskráin skal innihalda, auk hefðbundinnar sjúkraskrár, heilsufarsyfirlit, rannsóknaniðurstöður, læknabréf og önnur gögn, sem tilheyra sjúklingi.
- 4.2.3. Verksali ábyrgist að skrá öll óhöpp, slys og önnur frávik sem verða á hjúkrunardeildinni í frávíkaskrá, hvort sem sjúklingar, starfsmenn eða gestir verða fyrir þeim.
- 4.2.4. Verksali skuldbindur sig til að fara eftir reglum Landspítala um heilsuvernd starfsmanna. Þetta felur í sér að verksali skuli sjá til þess að allir starfsmenn og nemar sem starfa á deildinni, hversu stuttan tíma sem það kann að vera, skuli uppfylla sömu skilyrði og fram koma í gátlista vegna heilbrigðisviðtals við nýráðningu á Landspítala um berklapróf og bólusetningar sbr. fylgigögn með samningi þessum. Starfsmenn sem hafa fengið heilbrigðisvottorð skulu framvísa afriti af því til verksala. Verksali skuldbindur sig einnig til að sjá til þess að leiðbeiningum sýkingavarnadeildar Landspítala varðandi MÓSA sýkingu sé fylgt sjá gæðahandbók sýkingavarnadeildar. Landspítalinn mun bera þann kostnað sem af þessu hlýst.

4.3. Ábyrgð.

- 4.3.1. Verksali ber alla ábyrgð á verkefninu og framkvæmd þess, þar með töldum verkum undirverktaka og auk þess því tjóni er verkkaupi eða þriðji aðili kann að verða fyrir við framkvæmd þess.
- 4.3.2. Verksali skal hafa allar skyldutryggingar sem lög og reglugerðir kveða á um. Varðandi sjúklingatryggingu er vísað til 11. gr. laga nr. 111/2000 um sjúklingatryggingu. Samkvæmt þeirri grein eru heilsugæslustöðvar, sjúkrahús og aðrar heilbrigðisstofnanir sem ríkið á í heild eða að hluta undanþegin váttryggingarskyldu skv. 10. gr.
- 4.3.3. Verksala er bent á að hafa allar aðrar rekstrartryggingar í gildi vegna starfseminnar þ.á.m. tryggingar starfsfólks í samræmi við ákvæði kjarasamninga.
- 4.3.4. Verksali framfylgir ákvæðum stjórnarsýslulaga vegna þeirrar stjórnarsýslu sem honum er falið að annast og er hluti þeirrar þjónustu, sem hann veitir samkvæmt samningnum.

4.4. Vanefndir samningsaðila. Vanefndarúrræði

- 4.4.1. Ef verksali efnir ekki samningsskyldur sínar, getur verkkaupi rift samningnum. Áður en að því kemur skal verksala gert viðvart skriflega og honum gefinn hæfilegur frestur til úrbóta.
- 4.4.2. Hafi verkkaupi rift samningi vegna vanefnda verksala getur hann krafist verksala um þann kostnaðarauka sem af samningsrofinu kann að leiða. Verkkaupi getur og krafist verksala um bætur fyrir annað tjón eftir almennum reglum.

- 4.4.3. Ákvæði 4.5.1 og 4.5.2 gilda eftir því sem við á um vanefndir verkkaupa gagnvart verksala.

4.5. Undirverktakar.

- 4.5.1. Verksala er heimilt að ráða undirverktaka til að sinna verkefnum samkvæmt samningi þessum enda séu ekki minni kröfur til hans gerðar en til verksala í samningi þessum.
- 4.5.2. Ef verksali felur undirverktaka að taka að sér einstaka þjónustupætti samkvæmt samningi þessum, breytast í engu samningsskyldur verksala gagnvart verkkaupa.

4.6. Þagnarskylda.

- 4.6.1. Verksali og starfsmenn hans skulu bundnir þagnarskyldu um það sem þeir fá vitneskju um við framkvæmd samnings þessa og leynt á að fara. Um þagnarskylduna gilda ákvæði 18. gr. laga um réttindi og skyldur starfsmanna ríkisins nr. 70/1996 og skal brot á henni varða refsingu skv. 136. gr. almennra hegningarlaga nr. 19/1940, sbr. 4. mgr. 30. gr. laga nr. 88/1997 um fjárreiður ríkisins.
- 4.6.2. Ráði verksali undirverktaka til starfa skv. gr. 6.6 skuldbindur verksali sig til að láta undirverktaka og starfsmenn hans undirrita sams konar heit skv. 6.8.1.

4.7. Meðferð ágreiningsmála, réttarfar.

- 4.7.1. Mál sem rísa kunna vegna brota á samningi þessum skulu rekin fyrir Héraðsdómi Reykjavíkur.

4.8. Gildistími og endurskoðunarákvæði.

- 4.8.1. Samningur þessi öðlast gildi 14. maí 2008 og gildir til 31. desember 2009. Ef samkomulag næst er heimild til framlengingar og skal það liggja fyrir a.m.k. þremur mánuðum fyrir lok samningstíma.

4.9. Staðfesting samnings.

- 4.9.1. Samningur þessi er gerður samkvæmt heimild í gildandi lögum um heilbrigðisþjónustu og 30. gr. laga um fjárreiður ríkisins nr. 88/1997.
- 4.9.2. Af samningi þessum skulu gerð tvö samhljóða eintök og telst hvort um sig fullgilt frumrit samningsins. Eitt eintak skal vera í vörslu verksala og eitt eintak í vörslu Landspítala.

Dags 2. apríl 2008.

F.h. Landspítala Anna Stefánsdóttir

F.h. Grundar Jóhann J. Ólafsson

F.h. Landspítala Björn Zoëga

F.h. Grundar Gísli Páll Pálsson

Vottur að réttri undirskrift

Vottur að réttri undirskrift